

2021

2022

# VASTELAOVES GEZÉT

Vastelaoves Vereininging

De

# Rabbedabben

Haler-Uffelse

Jaargang 13

Januari 2022



# Rabbedab programma

*Ut programma is nateurlik önger veurbe-  
hood en hieëlemaal afhankelijk van de  
den geldjendje corona-maatregele...*

- 23 jannewari: Prinserecepsie (14.11 oor)
- 19 fibrewari: Bóntje Aovendj (20.11 oor)
- 24 fibrewari: Jeugdsleuteleuverdracht (18.30 oor)
- 25 fibrewari: Sleuteleuverdracht (19.00 oor)
- 26 fibrewari: Spaarkas lichte (20.30 oor)
- 28 fibrewari: Spek mit Eier & kiene (18.30 oor)
- 1 mieërt: Dolle Dinsdig mèt Optocht (14.11 oor)
- 2 mieërt: Hieëring happe (20.00 oor)

# 2022

ontwerp: Pepe

# Van de secretaresse...

## ...van de burgemeester...



Beste minse van Haler,

Mer, mer, gae höbtj de Vastelaoves Gezét ut aafgelaupe jaor mótte misse, gae wétj waal, corona of COVID-19 wie det inmiddels genömdj waerdj. En den zitte wae al bienao in 2022. Door al die misère höbtj gae ut aafgelaupe jaor de gezét mótte misse, mer noe is ze dur weer. En ich kin uch vertélle det det nog geine kattepis is, zoea wieëd höb ich mótte teruk kieëke in de archieve. En waat bliektj! Gae gaodj hie tekste en foto's aantrefte van de festiviteite rónjdóm ós jubileumjaor, want det waas dur te doon in 2019-2020. De Rabbedabbe bestónge toen 5x11 jaor en Prins Lard I waas toen óze Prins. Herinnerdj gae uch det nog? En ómdet dur aafgelaupe jaor geine vastelaovendj geveerdj is, waas Lard toen auch nog steeds Prins. Mer wae höbbe bedachtj det det waal hieël eintoeanig waerdj veur óze prins dus wae zeen toch van plan óm Prins Lard I dit jaor te gaon aafzétte. Dich kinst den auch neet ieeuwig Prins van de Rabbedabbe blieëve. De Jeugdcommissie is den auch druk in de weer gewaesj mit ut zeuke nao eine noewe Prins en adjudant en dit jaor höbbe wae auch weer ein Prinses! Auch det mót neet gekker waere!

Mer good, gae kintj tieëdes ut laeze van dit beukske echt uch herses laote kraake want ut zal soms laeze en kieëke zeen en den dinke: "waas det toen?" Jao, det waas toen. Wae wille óze jubileumprins den auch neet zoea mer passere en auch al is ut alweer twieë jaor geleeje det dees activiteite plaatsvónje, wae wille de annale van ós vereiniging compleet haoje, dus besteeje wae dur aandacht aan.

Mer good, genóg sjaele zeiver. Op ut moment det ich dit stúkske tekst veur uch aan ut tikke bön, zeen de Rabbedabbe drúk bezig mit de veurbereijinge van ut sezoeën 21-22. Mer mit alles in de achterkop det ut hieële fieëst auch dit sezoeën zoea mer door de plee gespeuldj kin waere. De coronabesmettingscieëfers laupe weer flink op, de euverheid leuetj weer van zich heuere mit allerlei restricties. Groeat risico det wae alles veur nop aan ut organiseren zeen. Mer den höbtj gae toch al aevegood ós Vasteaoves Gezét. En is Prins Lard I toch aevegood verlosj van de zwaore verantjwoordelijkheid die heuertj bie ut Prinssjap. En...höbbe wae eine noewe Prins, Prinses en Adjudant.



Ich wins häör in elk geval ein sjoeën vastelaovessezoeën toe en hoop van herte det corona dit jaor gein, of in idder geval neet tevööl, root in ut vastelaoves aete geit goeaje!

En vergaet neet woearóm wae dit allemaol doon:

***Vraogdj uch neet aaf waat Haler vur uch kin doon,  
mer vraogdj uch aaf waat gae vur Haler kintj doon!***



# Unne terukblik...(prins Lard I)



Ich wil allerieërst effe zégke det ich ut geweldjig en ein ieër vonj um jubileumprins te mooge zien.

Ich bin als prins oetgeroopen door unne geweldige illusionist, Nigel Otermans. Det waas hieël biezunjer. Ich waas auch blie det ich ut noe neet mieër geheim hoofdje te hoaje. Noa mien oetrooping waas der ein geweldjig fieëst met Sinterkloas en nateurlik neet te vergaete mét Big Benny.

De Prinsereceptie waas op 14 december. Dit waas echt het hoogetpuntj van miene hieële vastelaovendj. Zөө vööl minse die mich kwaame feliciteere. Det waas geweldjig.

En waat un verrassing. Doa stóng inins miene gitaarlieëraar en heb ich mien kunste oppe gitaar loate zien. Det vonj ich supervet mer auch bést waal spannendj.

En den de Bónte Aovendj. Det is altieëd un spektakel. Al die Halerse artieste die optraeie. Kei sjoeën. Ich en de hieële jeugdroad zoote veuraan en hebbe os boeëkpieën gelache. Of kwaam die boeëkpieën van alle snuk en chips??

De jeugdsleuteloverdracht waas auch hieël sjiek óm met te maake. Met zun allen zien we richting Häör vertrokke en höbbe os doa van de bestje kantj loate zien.

En den nateurlik de groeëte daag : de optocht en Dolle

Dinsdig. Als prins in de sjieke prinsewaage. Geweldjig. Ós pap en mam deeje auch mét als Köning en Köningin. Det vonj ich geweldjig. Doanao hebbe we de hieële oavendj nog lekker kinne hosse en springe. Waat waas ut ein groeët fieest!!!

Saame met mien adjudanten en de jeugdroad höb ich unne supergeweldjige tieëd gehadj. Ich höb genoote. Hie zal ich, as ich laater oad en grieës bön nog altieëd mét hieël vööl plezeer aan trukdinke.

Ich wil de noewe prins en prinses unne geweldjige vastelaovendj winse mét hieël vööl plezeer!!



# Unne terukblik...(adjudanten)



In 2019-2020 haaje wae mer leefst 2 adjudante (en gein Prinses, vandao). De adjudante Keano en Luc laote uch hie laeze waat ze dur van vónje...

**Adjudant Luc:** in 2019 mocht ik mij opgeven voor prins of adjudant van mijn ouders. Wat was is ik gespannen of ik gekozen zou worden. Samen met Lard en Keano fietsen wij naar de school in Rooy en op de fiets praten we steeds, ben je al gebeld door Rik? En toen we werden gebeld kregen we niet te weten wie de anderen waren. Maar toen we eenmaal gebeld waren durfde niemand het meer te vragen op de fiets. Paar dagen later moesten we ons verzamelen bij de Uffelse molen. Daar zag ik de auto van keano al staan en dacht ohhhh dan is Keano prins en ik zijn adjudant. Nu was

het wachten op de prinses maar wie kwam daar aan..... Lard..... Ik was verbaasd maar na de uitleg waren we alle drie heel blij. Het werd prins Lard en adjudant Keano en adjudant Luc. Dit jaar geen prinses maar een super mannenteam. Op pakjes avond werden we bekend gemaakt door onze eigen illusionist Nigel Otermans, een hele spectaculair optreden. Big Bennie gaf een super optreden en ook de verenigingen van Hunsel en Ell waren goed, gezellig en iedereen dansten. Lard, Keano en ik hadden een stukje waar we wethouder Martens belachelijk maakte. Dit was geweldig om te doen. Ons volgende optreden in Haler was de Bonte Avond. Dit was even leuk en lachen net als elk jaar. We deden daar weer ons stukje over wethouder Martens en zelf deed ik nog een stukje met mijn vader en de vader van Lard. De sleuteloverdracht was ook leuk alleen jammer dat ons optreden niet in de prijzen was gevallen, wij vonden het in ieder geval erg

leuk om te doen. En dan eindelijk dolle dinsdag, eindelijk boven op de kar. De optocht was weer groots, veel mooie karren en leuke ideeën. Nog even gezellig hossen in de zaal met iedereen en dan ineens is het weer voorbij.... Het was een Top jaar, super leuke carnaval gehad! Op naar de volgende .....ooit.....



**Adjudant Keano:** Ich, adjudant Keano hób genootte van de vasteloavendj van veurig seizoen. Ut oetroope tiejens de peksekaovendj mit os stuk veur wethoajer Martens waas sjoenen.

Same mit Prins Lard en miene mede adjudant Luc, hóbbe we vööl lol gehadj bie de veurbereiding hievan. Auch de onthulling door onze eige Nigel waas geweldig. Doanoa unne te gekke prinsereceptie gehadj. Sjiem om te zeen wieveul minse kwoome veur ós. Auch ut bezeuke van de anger recepties waas leuk. Toen waardje ut 20 februari, miene verjoardaag. Dea hóbbe wae goot gevierdj tiejes de sleuteloverdracht. En carnivalsdinsdig de optocht van Haler. Sjiem om al die wages vanaaf ut hoeagste puntj te moge zeen. Veel wages en minse die vol enthousiasme mit doon om derveur te zörrege det Haler unne sjoene optocht heet. Doanoa hóbbe we fieëst geveerdj in ut Dörpshoeës. Ut waas unne geweldige vasteloavendj woea ich mit vööl plezeer aan teruk dink.



Ich wil prins Lard en adjudant Luc bedanke veur de gezellige tieëd.



# Noewe kavel...

Wae vanne redakse zeen der vanzelfsprekendj as de kippe bie, as ut geit om noets oet ut dörp. As der urges get gebeurdj, of juist neet, wae weite det as iëerste.

En zeeker gezeen de “demografische ontwikkelinge” in Midde-Limburg in ut algemeen en Haler in ut biezunjer, wille wae gaer ut nädje vanne kous weite as der nuuj hoeze geboewdj waere, en as der bouwkavels oet ge-gaeve waere.

Normaal kumtj det inne gezét of oppe wepsait vanne gemeindje. Toch waas der aafgelaupe jaor get raars aan de handj. Der zeen toen naamelik bouwkavels oet gegaeve aan de Sniekstraot. Jao, gae laesj ut good; aan de Sniekstraot, die reesbaan tusse Pinxt-Huuske en de visvieëver.

Wie weite wae det? Nou, geweuen ómdet de gemeindje al de breevebusse haaj opgehangen.

Hiej-onger zeetj gae namelik al de breevebus veur Sniekstraot 39. Sniekstraot 39 kumtj te ligke tusse Pinxte-Huuske en de aafslaag nao de Pinxtestraot.

Mer ut zeen aevezieër waal raekels dao bie de gemeindje; ze hange de breevebus al op zoeadet de aangifte veur de WOZ al versteurdj kin waere, *zonger* det ut hoes der al steit! Wae vanne redaksie vinje det toch ein bietje sjanj.



# Ut hek bie Richard...

Eederein in ós durp kintj Richard waal. Det is dae mins dao oppe hook vanne Isidoorstraot, mét ein kemping omme hook en eine bussel dieke vrachtwages achterom. Hae is auch ein tiedje bie de Raod van Half Ellef gewaesj en heet zich dao de bul oet de boks gerendj. Auch riedj hae al jaore met ein dieke blauwe tractor inne optocht om de ker van van VV de Gekke Men te trékke.

Noe wiltj ut toeval det twee jaor geleeje Richard de hieël Raod van Half Ellef nao de Sleuteleuverdracht bie hum thoeës haaj oet geneuedj veur ein pilske en get oet “de vet-vieëver”. Jao minse, gae laestj det good. Noe wil ut toeval det eemus vanne redaksie auch bie det spektakel waas. Dae gluurdje ins omme hook vanne biejeuke om te kieëke of det geine groetspraak waas; dae “vet-vieëver”. En inderdaad, dao stóng ein soort van spieëskuup vol

mét pruttelendj bakvet en dao stóng Sven en Richard frikkedelle en krokette te braoje det ut eine aard haaj. Ut waas inderdaad ein hieële vetvieëver, dus ut waas gein groetspraak.

Mer letst kwoom ein van os reporters euver de Isidoorstraot gereje, en dao zoog der get bie Richard achterom, hae kos zien uig neet geluive.

Dae reporter dacht echt det Richard de waeg kwieët waas. Dao hing ein hek waal eine maeter bove de grondj. Wae begoste oppe redaksie vanne gezét vanalles te spikkeleere, mer kwoome der neet oet. Om toch get mieër euver det hek te weite te koome, heet ein van ós redakteure de kompjoeter van Richard gehektj. En nao det hekwerk van dae redakteur wiste wae auch mieër van det hekwerk van Richard.

Richard haaj namelik bie Mols Hekwerk ein hek besteldj van 2 maeter hoeag, mer hae haaj mer geldj veur ein hek van eine halve maeter.... Wat gaon ze der dao noe aan doon? Kumtj der ein leijerke bie te staon om die hek ope te krieëge? Kuitj Richard veur Chantal eine Lamborzjienie dae onger det hek door pasj? Waere der droeve teege aan gepootj?

Wae vanne redaksie höbbe gein idee. Mer wae vanne redaksie vinje waal det bie Richard ut hek van de dam is, en det ut nog ein hieël hek-setoer waerdj om dao nog get van te make. Wae zooje den auch hieël Haler wille vraoge om vanaaf noe duchtig erpel en eunje te gaon aete, en die te kaupe bie Richard in “die schöne Erpelstube”. Misjiens det Richard van det geldj nog get aod iëzer ónger aan det hek kin hange.



# En nog get fotookes...



# Oetneuediging Receptsie...

Wae, Prins Luc II, Prinses Dewi en adjudante Imara , hōbbe de ieër óm uch oet te mooge neuedige op ós Prinselikke receptsie.

Deeze waerdj gehaoje op **zunjig 23 jannewari** van 14.11 oor tot 16.11 oor.

Gae zeetj den hertelik welkom in:

**Ós Rabbedabben Pelieës**

Zaal  
Ons Dorpshuis  
Pinxtenstraat 1  
6012RJ Haler



# Prinsereceptsie 2019-2020...





# Blek Tjoesdee...

Jao minse, wae weite ut allemaol. Aafgelaupe jaor 2020 waas ut jaor vanne corona. Alles loog op zien gaat (en den bedoele wae neet oppe IC) en niks kos of moogdje waere georganizeerdj. Zoea-auch de Vastelaovendj.

Niks waerdje gedaon, of den toch kwaollik get. In Haler dus auch geine Dolle Dinsdig. Dae zooy in 2020 valle op dinsdig (jao jao) 16 fibrewarie.



De Isidoorstraat zooy weer knoets vol staoon mét jeugd en groeate minse die hun krejaasies en fratse aan de toesjouwers wooje laote kieëke. De Vastelaovesgroepe oet Hunsel en Ell, de einzegengers, de kleine groepen, groeate groepen; neemes dao. De meziek dae van de waages aafknaldje, de gesminckdje snuutjes, en neet te vergaete óze Jeugdprins en prinses met heure adjudant en gevolg; niks van det al. En netuurlik auch gein publiek naeve de weeg, en laternaon inne zaal.



Nae, ut waas op 16 fibrewarie 2021 "Blek Tjoesdee", zoea-as ze det zégke. Wae höbbe op dae daag rondj 14.11 oor, de tieëd det de optocht geit trekke, get fotoos gemaaktj om dae kaoje kale daag te herinnere. Van Jos Moeset tot aan ut Dörpshoes, en in ut dörp zelf; doa waas niks kepot, dich kos ut nog heuëre as ein aomzeiksel der eine aaf reet, zoea stil waas ut.

Det geit os in 2022 neet gebeure, hoope wae....

# Te kaup, te gaef, te krieëg...

Op eine sjoëene griëze daag in mieërt leep de hof-fotograaf vanne Vastelaoves Gezét door ut dörp. Hae kuijerdje, in gedachte verzónke, get rón dj en leep zoedoondje naeve de zaal aaf de Pinxtestraot in.

En dao, naeve de zaal, zoog der get apaarts oppe oprit van Wiel. Dae Wiel wooj neet wachte op de rommelmert, hae haaj gein geduldj toet det ut kofferbakverkoop waas, en hae haaj al hieëlemaol gein zin om nao de stort te rieje.

Dus Wiel haaj zich ein stukske pepeer georganiseerdj en dao zien booadsjap duudelik op gesjreeve: "gratis meenemen".

Noe heet de fotograaf van de Vastelaoves Gezét auch oeats zónne waage gehadj. As zo'n dink oppe hóndj is, den is dae aan de straatstein neet kwieët te rake.

Toch dinke wae vanne Vastelaoves Gezét det ut Wiel waal geluktj is om dae rammelbak te verpatse, want wae zeen um noe geregeldj in ein soort van klein vracht-uiteke rón dj ketse.

Missjiens det der op aafroop nog hiej en dao ein kuubke sjampinjon-mest kan wegbringe veur Jos Mousset.



# Wie eine knieën inne koplampe...

Soms zeen der van die momente in ut laeve, det eemus zal dinke: "Woearom noe toch?"

Dit is zo'n moment. Gae kintj deeze mins oppe foto ongetwiefeldj waal, dus wae vanne redaksie vónje ut den auch neet neuedig om Maurice verder aan uch veur te stelle. Zien vrouw Janneke heet al meute zat mét um (hae sjientj zich krek zoea te gedrage as die twieë men van hun; en die zeen 4 en 6 (ongevieër) jaor aod), en óm Maurice den auch nog in de gezét oetgebrijd veur te gaon stelle, zoadet eederein um onnog oppe straot kin herkinne, of nog erger, det de minse Janneke der op nao gaon kieëke, zoea van: "Ocherm, kieëk dao, is det neet det erm vruike van dae eine, dae de veurige daag inne Vastelaoves Gezét stong ...", höbbe wae vanne redaksie oet kompassie beslote omdet den auch mer neet te doen.

Van weem wae dees foto höbbe gekreege, gaon wae auch neet zégke; det véltj ónger de zoeagenaamdje "bronbesjerming", iets det heilig is ónger zjoernaliste.

Mer affeng, gae, mer wae oppe redaksie auch, vrooge ós aaf waat der gaondje waas wie det dees foto genome waardje? Egelik om ieërlík te zeen; gein flauw idee. Neemes neet.

Wae höbbe waal ein vermoede. Zoog ut kinne zeen det Janneke dees foto heet gemaaktj op 20 september wie det ze veur Maurice de deur ope deej vol verwachting, en det Maurice neet ins ein bus-selke dreueg-bleumkes of tenkstasjon-tulpe bij zich haaj?

Dae erme jong kieëkt in eeder geval waal wie eine knieën in de koplampe. Vol paniek, radeloosheid, en mét ut (terechte) idee: "Hiej kóm ich noeats onger oet zonger flinke sjajj."

As dit echt waar zoog zeen, den kin Janneke bij de redaksie van dees gezét as nog ein bus-selke bleumkes kome ophoole.



# Water oet Hunsel...

Höbtj gae ut gelaeze? Höbtj gae ut geheurdj? Of nog erger, höbt gae ut gepreufdj?

Waat is ut geval?

Op 13 jannewarie veurig jaor kwoom der eine meel oppe redaksie binne van de Wee-Em-El. Det is de club die veur al os drinkwater zörgtj.

Zoeas gae kintj laeze, is der nogal get gebeurdj met det water tusse Bieëgdje en Hunsel.

Allerieërst steit der minder straum op want de geleidbaarheid is lieëger. Det höbtj gae kinne merke; de straumraekening ging omhoeag.

Den zitj der van alles minder in; chloride (dus wae mótte weer tenj gaon poetse), sulfaat, calcium, en magnesium. As der minder in zitj, den mótt der auch get mieër in zitte. Det is auch zoea; der zitj mieër boor in. Den dinke wae oppe redaksie gelieëk: "Welke boor?". Nico van Rietjes? Albert van Dirks?

Al met al waere wae hiej toch eine duchtige poeat oet gereete; bienao alles in det water van Hunsel is minder en lieëger den det water oet Bieëgdje. En as de prieës den omlieëg waas gegange; allá. Mer niks daovan; geweuen dezelfdje volle mep per kuub. Wae vanne redaksie wille den auch gaer eine protestbreef gaon steure nao Wee-Em-El. Gae kintj via de redaksie laote weite of gae eure naam auch deronger wiltj höbbe. De breef zal get waere in de trant van:



Beste meneer/mevrouw

Wij van het dörpje Haler vinden het sjanj dat jullie zo'n verkeskup zijn om van dat water te verkopen zonder wat derin. De druppel die de emmer deed overlaupen was wel dat de prijs hetzelfde bleef. Enkelen van ons staat het water aan de luppen. Die pongele van de réngel in de drup door al dat gezeiks.

Wij willen waa(te)r voor ons geld!

En dat jullie het druk hebben (zie eerste zin van jullie meel) vinden wij grote zeiver.

Dus regel ut maar eens rap

De groete vanne redaksie

Beste mevrouw/meneer Hendriks,

Naar aanleiding van klachten over de waterdruk heeft WML in mei 2018 de watertoevoer naar (een gedeelte van) Ittervoort en omgeving veranderd. Tot mei 2018 kwam uw drinkwater uit Hunsel en vanaf mei 2018 komt uw drinkwater uit Beegden. Inmiddels heeft WML aanpassingen aan het drinkwaterpompstation in Hunsel uitgevoerd. De tijdelijke omzetting kan nu weer worden teruggedraaid. Dit betekent dat u vanaf **week 5** (de week van maandag 27 januari) weer drinkwater geleverd krijgt uit Hunsel. Met de aanpassingen aan het pompstation zouden drukklachten tot het verleden moeten behoren.


#### Wijziging samenstelling water

Vanaf maandag 27 januari aanstaande gaan we u en de overige bewoners van Ittervoort, Neeritter, Hunsel en Haler voorzien met water vanuit pompstation Hunsel. Net als het drinkwater vanuit Beegden is dit water van uitstekende kwaliteit en voldoet het aan alle wettelijk eisen. Wel is de samenstelling van het water anders. De grootste verschillen leest u in onderstaande tabel:

Parameter	Eenheid	Pompstation Hunsel (nieuw)	Pompstation Beegden (oud)	Wettelijke maximum waarde
Geleidbaarheid, EGV 20°C	mS/m	30,7	49,7	125,0
Chloride	mg/l	9,7	37,0	150,0
Sulfaat	mg/l	6,3	66,5	150,0
Calcium	mg/l	32,0	66,1	geen normering
Magnesium	mg/l	11,9	7,8	geen normering
Totale hardheid	°D	7,2	12,7	> 5,6
Boor	µg/l	130,0	19,0	500,0

#### Vragen

Als u meer wilt weten over de drinkwaterkwaliteit, kijk dan op [www.wml.nl](http://www.wml.nl). Heeft u vragen, dan kunt u ons mailen, [info@wml.nl](mailto:info@wml.nl), of bellen op 043 – 309 09 09



## ADHD (alle dagen hevige dorst)...

Oppe vriedig veur vastelaovendj is in Heur de sleuteleuverdracht veur de dörpe van de gemeindje Leudal. Veur ós es raad van (half) elf is dit altieëd een biezunjer momentje. Wae höbbe oze jeugdoraod neet bie os, het is dao werm, stiktj van de bekindje en het is dur knap gezellig. Al met al dorstig waer.

Wat betreftj det létste kumptj dao bie det wae van de raad van (half) elf meine det wae een streepke veur höbbe. Wae höbbe namelijk al ein hieël sezoëen lang op Lindjebaum moge knauwele want dae vertappe ze in het Dörpshoeës auch. Dus einmaal in Heur (woa ze dezelfde zaftie vertappen) wille wae idderein laote zeen wie good det wae dao weeg met kinne.

Noe höbse neet allein dorstige luuj, mer auch hieële dorstige luuj. Oze vorst Rik is d'r zoea eine. Drinkte wie ein badkuup; laot mer vollaupen! Op ut inj vanne aovend waas Rik neet mieër te verstaon en woor de toestandj van de rest van raad neet vööl baeter. Op hoes aan!

Óngerweges in de bus kreeg Richard ein (nao eige zegge) good idee; "Ich bel Chantal op det ze bie os de vetvieëver aanzétj, den gaon wae bie os nog get frikkedelle bakke!"

Het kan neet anges det Chantal trots is gewaesj op häöre mins det dae neet heet getwiefeldj óm häör daoveur midden in de nacht oet bed te belle! Wat veur gesprekke d'r nog geveurdj zeen bie hoeze Broekman weete wae nateurlik neet, mer oeteindelik waas het Sven dae veur os de frikkedelle heet staon bakke.

Rik haaj óngertusse van det hieël theaterstuk nateurlik niks mét gekreege. Dae waas zich hevig aan het concentreren óm rechtop te zitte. Dus wie det wae bie Richard stopdje meindje Rik det wae weer op ut plein stónge bie ut Dörpshoeës. Dus Rik stuuftj de bus oet en rentj bie Richard zoa knal de greppel in!

Stefan heet dit moment mét ein foto wille verieuwige en, nao per ongeluk ein



paar selfies genomme te hōbbe, is d'r toch iets van een foto gemaaktj. Wae hōbbe nog stevig gelache bie Richard en blieëkbaar zeen wae oeteindelik toch thoës gekomme.

Echter..

Noa al ein hieel poeas niks mieër van Rik geheurdj te hōbbe veel ut ós op det Richard dae bewusdje greppel heet toegeduudj en graas op gezeidj. Hae zal Rik d'r toch waal ièerst oet gehoordj hōbbe??!!!

Wae met twieë man sterk van de raod poolsheuegdje gaon numme. Gelukkig haaj Richard d'r waal een piepke bie gezatte det d'r altied genog loch haaj, mer Rik kinnendje zal d'r toch



waal dorst hubbe gehadj. Zowie detj ge op de foto kintj zeen hōbbe we um nog mer gauw get drinke gegaewe.

Ut is allein erg jaomer det ós blinje raodslid ut navigere nog neet erg ónger de knie heet. Dae heet nog steeds gein bezei(k) woea det d'r noe eigenlijk steit...

## Köning, keizer! Mer wannieër admiraal?...

Gae kint allemaal nog waal die reklaam: "Koning, keizer, admiraal, Popla kennen ze allemaal!"

Dao heet dit verhaol gein poeës mét te make.

Op eine sjoene avendj in september leep ein van os redakteure euver de Pinxtestraot. Dao kwoome oet de kefee ein paar men nao boete gedwarreljdj, waat op zich nieet zoea hieël gek is veur ein kefee. Die men, eine oppe fiets, de rest te voet, leepe en fietsdje in ein neet zo'n hieël rechte lieën midde euver de Pinxtestraot vanne linker nao de rechter stoeprandj.

Omdet ooze redakteur der toch ut zien van woaj weite, vroeg der of ze eine sjoene avendj haaje gehadj. Det waas waal degelik zoea. En det ging zeker op veur ein van die men; Luc van Hansen. Hae waas grueëts omdet hae de sjerpste blik en de meist vaste handj haaj gehadj dae avendj; hae waas de keuning vanne Grenssjutters! EN neet allein det, omdet det al ut derdje jaor op riej waas, waas Luc onnog keizer! Hienaeve zeetj gae ein foto van Luc oet 2019 as hae veur ut ièerst keuning is gewoore mét mer leefst 323 puntje.

Oppe redaksie vraoge wae os aaf: "Wannieër weurdj Luc auch admiraal?" Want det hae vast op zien bein kan staon, haet dur mét al det priessjeete waal beweze!

Euveriges; dae avendj dao oppe Pinxtestraot woore die vaste bein nurres mieër te bekinne. Bij neemes van die 4 men trouwes. En waat de redakteur zoea begrepe haaj, ginge ze der nog eine pitse bij de kersverse keuning en keizer. Det zal de vastigheid inne bein gein good hōbbe gedaon.

As Luc zich met de Vastelaovendj bie dae bewuste redakteur meldj, den kriegtj hae as fillisitaasie ein pötje beer; naames de redaksie eine dikke perfisijat!!



# In memoriam...



Op 7 fibrewarie 2021 is Lei Salemans ós ontvalle. Lei waas eemes dae de Vastelaovendj ein werm hert toe droog. Hae waas neet gaer oppe veurgrondj, mer achter de sjerme waas hae altieëd van de partiej; zelfs in 2019 toen hae al get zeek waas.

Lei heet altied zien sjeur besjikbaar gesteldj veur de Rabbedabben óm de prinsewage in op te stalle. Mer veural waas Lei der as de kippe bij om daezelfdje prinsewage volgelaaje met de enthousiaste jeugdraod rondj te rieje door ut dörp in de optocht mét Dolle Dinsdig.

Op ut kaertje van zien euverlijdensbericht kinne wae Lei zeen wie wae Lei ut beste kinne; zittendj op ziene Fendtl woemet hae auch de prinsewage trok. In 2018 is Lei door Stefan, Thijs en Richard names de Rabbedabben ongersjeije veur al zien verdeenstelijke werk.

Lei is 85 jaor aod mooge waere. Lei, bedanktj veur alles!

Groot  
is de  
leegte  
die hij  
achterlaat

Mooi  
zijn de  
herinneringen  
die  
blijven

Lei Salemans

1935 - 2021



# Sponsore...

## HETHOBBIJSCHUURTJE

### Activiteitenboerderij

Nico & Carin Rietjens

Lochterstraat 4 | 6012 RD Haler

0495-552282 | b.g.g. 06-36299112



[www.hethobbyschuurtje.nl](http://www.hethobbyschuurtje.nl)

[carin@hethobbyschuurtje.nl](mailto:carin@hethobbyschuurtje.nl)



# Sleuteleuverdracht 2019 (1)...

Veur de jeugd Raod is de Sleuteleuverdracht ein van de groeatste hoeagtepuntje van de vastelaovend. Lekker hose en springe oppe Vastelaoves mezieëk en netuurlik neet te vergaete mét ut podium op bie j al die artieste.


Wat ze dao in Heur vanoet de organizaasie good doon, is det ze geine alcohol sijnke aan de volwassene. Det is waal good vanoet de jeugd bezeen, mer ut is geine doon veur ós.

Hienaeve zeetj gae ein bestel-liestje van de groeate Raod van Half Elluf, en gae moogdj van de redaksie aan neeme det dit liestje neet is verangerdj tusse 7 oor en 10 oor 's aoves.

En de oplettendje laezer zal geliek 2 dinge zeen opgevalle aan det liestje:

1) wiezoea Raod van Half Elluf; der waere steeds 16 konzumpsies bestéldj. Det kloptj, mer der zeen gelukkig auch aojers van de jeugd mét, en die drinke mét, want nog erger as eine ganse aovendj gein pilske kinne drinke is eine ganse aovendj op eine dreuege zitte!

2) waas Stefan neet mét? Joawaal, Stefan waas waal mét; dae sinas is van hum. Hae heet de hieële aovendj mét ein glaeske sinas inne hook vanne sporthal zitte böäke. Wae vanne redaksie hubbe um sangerdaags nog ein busselke bloome gesteurdj (Stefan zei toen: "weite die noe nog neet det ich gein bloome drink?") mer wae dinke det Stefan al euver ut ongemaak haer is. Gelukkig mer.



# Sponsore...

Tuin derij

De Locht

Rabarber

# Sleuteleuverdracht 2019 (2)...



Sinds det Leudal ein fuuzie-gemeindje is, is de Sleuteleuverdracht in ein anger jeske gestoke. Ut is noe ein groeat spektakel in de sporthal van Heur. Van alle 16 kerne kome de Vastelavesvereniginge bie-ein veur eine sjoene avondj. Oet eeder dörp kome de Prins en Prinses nao bove om de sleutel van de burgemeister in ontvangst te neeme. Omdat wae in Haler geine groeatminse prins höbbe, moog de Vorst det eeder jaor doon.

Zoea auch in 2019. Ut noewe dao-aan was det wae eine nuuje burgemeister höbbe. Nao zoeaveul jaor waas burgemeister Arno Verhoeven opgevolgdj door burgemeister Desiree Schmalschläger.

Det waas toch efkes winne veur de Vorst van de Rabbedabben. Op dees foto zeetj gae burgemeister Desiree Schmalschläger in

ut midden, met links (veur de kieëkers) Vorst Jim van de Puinesjödders oet Ittervoort, en rechts (veur de kieëkers) Vorst Rik van de Rabbedabben oet Haler. Gae witj neet wat mevrouw Schmalschläger allemaol gezagdj heet, en al hieëlemaal neet waat die twieë vorste daovan dinke.

Mer de gezichte spraeke book-deile; mevrouw Schmalschläger is beheuerlik content met wat ze verteldj heet.

Wat heet mevrouw Schmalschläger gezagdj, en wat dinke die vorste? Wae vanne redaksie vónje dit waal reeje veur ein soort van kwis. Ut antwoord steit urres anges in dees gezet (as wae det neet vergaete).

## Mevrouw Schmalschläger heet gezagdj:

- zoea, ich gaon dalik heivers met de puuët omhoeag oppe bank
- ich höb 40 gratis bonne gehadj van de organisaasie; gae auch?
- die twieë meine waal det ze de sleutel van ut gemeindjehoeës höbbe, mer dae pasj gaaroets neet

## Vorst Jim dinktj:

- jaojao, det zoi ich auch waal wille; nao hoeës mét de puuët omhoeag
- dju, zeen wae met de Puinesjödders toch ein



bietje geneidj; wae höbbe gein gratis bonne gehadj  
c) och waas ich mer, bie moeder toes geble-he-ve

**Vorst Rik dinktj:**

a) heurdje ich det noe good? Leet dao eemes der  
dao eine vieze fiene vleege?

b) gratis bonne? Niks gratis bonne. As we die  
vanne Raod van Hallef Ellef zooje höbbe gekrege,  
den woore det der:  $40 \times 11 : 2 = \dots$  noe te moeilik  
c) det is gek; as ich nao rechts kieëk, zeen ich links  
gein bul

De winnaar van dees kwis kriegtj hieël missjiens oeats  
waal es eine geweljige sjoene pries! Met den motte de gooj antwoorde waal urres in dees gezet te vinje zeen ...



**Sponsore...**

**Henderikx**  
UW GROENE  
vakwinkel

Weverstraat 5a Hunsel tel. 0495 786807



**HAR HENDRIKX**  
BOUW- EN TIMMERWERKEN

Telefoon: 0495—586 408

Mobiel: 0623—228 273





## Sponsore...



**BROEKMAN B.V.**



PLUIMVEE-ENTBEDRIJF  
**BROEKMAN B.V.**



## Sponsore...

FL Security,  
Gespecialiseerd in beveiliging op  
verschillende niveaus

Laagveld 2  
6014 DD  
Ittervoort



## Donateur waere?

Wiltj gae es particeleer auch uch steinke biedraage aan de in-  
standjhaojing van de Halerse Vastelaovendj, doneertj den

**€ 11,-**

op bankraekeningnummer NL 22 RABO 0138613532

# Raekels, det zeen ut...

De jeugd van tegewoordig, en veural die oet Haler, die make der ein putje van; gein inkel ontzag mieër veur gezag, auch

neet veur de iets minder jonge mede-mins, en al hieëlemaal neet veur de Vorst vanne Rabbedabbe.

Dae kreeg op 1 april 2020 ein brief inne bus van de gemeindje. Dae brief steit hiej auch in dees gezet. Dae Vorst, dae erme mins, dae sjrok zich kepot, mos nao dokter Takken in Rooj om de bloeddruk te laote kontrollere, en kreeg te heure det der ein gans jaor lank gein beer moogdje drinke!

Dus ut haaj nogal get aan. Mer dokter Takken oet Rooj, neet de sjtómste mins dae hiej rónj löptj, dae vroeg aan de Vorst of hae det tillefoonnummer in de brief auch al gebeldj haaj? Nae dus, door alle konstipæasie konsternaasie waas de Vorst det vergaete.

Heythuysen, 1 April 2020,

Beste carnavalsverenigingen in Leudal,

Het is jullie allemaal bekend dat afgelopen carnavalsseizoen de brandhaard is geweest voor de uitbraak van het COVID-19 virus. Ook wel Corona virus genoemd. Door deze uitbraak zijn er tal van activiteiten en evenementen die verschoven cq afgelast worden.

In een extra geplande bijeenkomst van het college zijn daardoor ook enkele ingrijpende beslissingen genomen. Voor jullie als carnavalsverenigingen heeft dit ook gevolgen.

Om de andere sportverenigingen, buurtverenigingen, winkeliersverenigingen en welke dan ook een mogelijkheid te geven om hun evenement cq activiteit doorgang te laten vinden.

Is besloten carnaval 2021 te verplaatsen. We verzoeken jullie als verenigingen om het reguliere carnavalsseizoen te verplaatsen naar de zomer van 2021. Met als startdatum 1-4-2021.

Als gemeente gaan we ervan uit, dat dit jullie voldoende mogelijkheden biedt om een alternatief zomer carnavals programma op te zetten.

Met vragen omtrent deze beslissing kunt u contact opnemen met telefoonnummer; 06-5 [redacted]

Hopend jullie hiermee voldoende te hebben geïnformeerd.

Met vriendelijke groet i.o.



Mw. D. Schmalstätter  
Burgemeester van de gemeente Leudal



Wie det der van de sjrik become waas en auch thoeës, paktje hae de tillefoon en beldje det nummer.

Noe zulle wae vanne redaksie verder gein oetsprake doon, of gaon citeere van wat de Vorst allemaal heet gezagd nao-det hae de tillefoon haaj opgehangen, mer ut waas duudelik det hae duchtig bij de pueët waas genome door ein van de leeje vanne Jeugdraod van Haler!

Ut mot auch neet hieël veul gekker waere. Wae hubbe van de redaksie waal vernome det de Vorst verwachtj det dae betreffende jóngeling zich mét die vastelaovesdaag bij hum meldj met ein lekker glaeske beer (want det moogdje weer van dokter Takken) om van de sjrik te become.



# Sponsore...



**STRAOTERHOF**  
**BOERDERIJCAMPING**



# Proclamasie...

## Luc:

Hie staon ich den eindelijk as Prins Luc II veur uch klaar  
Nao det hopeloos sjaemele móndjkepkjes Corona-jaar  
Veur Prins Lard I, adjutant Keano, en veural adjutant Luc eine  
dikke merci

Die woore namelijk in functie waal tweeë jaar op riej

Same met Prinses Dewi en adjutant Imara gaon wae der get  
sjoens van make

Wae zulle ós door gein viruske of niks van de wieës laote gerake

Mien mam is van Ruiver en sleuteltj aan minse in ut zeekenhoes  
Miene pap is van Mokum en sleuteltj aan alles wat los en vast zitj, det  
duit hae aan thoeës

Gae kintj waal huëere det ich Limburgs kal mét ein Almerens accent  
Mer krek wie os mam teege os pap zei: Ut kan zoea gek neet zeen mer  
"alles went"

## Dewi:

Ich bin Prinses Dewi en gebore in ut Rabbedabbenlandj  
Veur Vastelaovendj sjuuf ich alles aan de kantj  
Auch hub ich in ut plat neet zo'n groeate bebbel  
In het Nederlands ben ik een echte grote kwebbel  
Mijn pap is een echte Moeëreboek, en komt dus van Ell  
Mijn moeder is een echte Budelse Geit, uit Brabant dus, dat dan weer  
wel

## Imara:

Ich bin adjudant Imara, ein Rabbedab in hert en neere  
Ich gaon mich meé de Vastelaovendj duchtig amezeere  
As kleindochter van Christ van de Pinxt bin ich ein echt Limburgs maedje  
En zing ich met, mét eeder Vastelaoves-plaetje  
Door miene pap höb ich zo'ne Italiaanse achternaam gekreege  
En kinse mich veur pizza wakker make, dao hoof ich neet om te leege

## Luc:

In Tungelder bij de Scouting dao kinne ze mich waal  
Dao bin ich 2 kieër in de waek te vinje, neet normaal  
Auch de reddingsbrigade zuut tweeë kieër in de waek miene snoeët  
Den hool ich idders kieër get drenkelinge der oet

## Dewi:

De school is niet de enige plek waar ik flink blok  
Dat doe ik ook bij de volleybalclub Stravoc  
Verder ben ik graag bezig met schilderen, knutselen, en tekenen  
Dat doe ik liever dan spelling, aardrijkskunde, geschiedenis of rekenen

## Imara:

Ich höb ut er mer druk mét; nao sjoel oppe fiets door waer en windj  
Thoeës miene eige rommel opruume, ich vinj det get veur mooders, neet  
veur ein kindj

Mét voetballe mook ich eeders kieër hands, dus dao bin ich van aaf  
Mer met handballe moog det juist weer waal, det vinj ich kei-  
gaaf



**Samen:**

Nog noeats haaj Haler zo'n muzikaal trio as adjudant, prins, en prinses

Want wae speule bie fanfare Elturo op oetveuringe, en zeen altieëd bie de les

De saxofoon en hoorn zeen ós instrumente

Dao-op speule wae alle meziek, zónger mankementen

Deze Vastelaovendj steit veur ós in ut teiken van mezieëk

Zoea gaon wae rón dj in ut Rabbedabben-rieëk

**Luc:**

En det ónger ós motto:

**Saxofoon, hoorn, alaaf,  
Same blaoze wae ut daak der aaf!**



**Sponsore...**

**Ons Dorpshuis**  
Café Restaurant Frituur

**Efkes 3 daag gein restaurantj  
want ut aetmeubilair geit aan de kantj!**

**Wae hosse en springe saame mét  
Prins Luc II, Prinses Dewi en adjudante Imara en de Jeugdroad,  
En det doon wae in ós café aan de Pinxtestraot!**




# Dolle Dinsdig...optocht...



# Dolle Dinsdig...fieëst...



# Bóntje Aovendj...





# Vlegelkes beer...

Sinds dit jaar kinne wae uch verblieje mit ein eige Halers beerke...ut Vleegelkesbeer. Höbtj gae de verkuipers gemisj bie de verkaup van dae euverheerlijke kerboeët, superlekkere waafels of dit beukske (den kintj gae dit euveriges hieëlemaal neet laeze...) den kintj gae uch melje bie ós lid Marco Leggieri, det is oze brouwmeister.



# Jeugddaag 2021...

Nao ein jaor van stil zitten, wachten, aankieëke, nog mer unne kieër verzétte, eine reminder en ein aanvulling op de reminder waas ut den eindelijk zoeë wie-éd! Ut jeugdoetstepke!

As wae in de VS zooje woëne, zooje wae dur gein seconde over nao dinke om op "nain-iellenvun" er op oet te trékke. Mer wae woëne in Haler, dus dur waerdje gegange! Op zaoterdig 11 september met ós jeugdraod nao Toverlandj.

Wae höbbe vernome det aojers veuraaf duudelijk waerdje herinnertj én geïnstrueerdj; 'Dinktj gae dur aan om uch bloedjes van sjatjes van kindjes op zaoterdig om 9.00 oor op ut kirkplein te droppe mét de sunjisse kleijer aan en dreueg stavelkes en eine zuuvere snoterlap? Dan bezörge wae ze eine sjoëne daag en zörge det ze om 18.00 oor terug zeen. Den stoppe wae ze als we terug zeen pratsj-vol mét friet en frikkedelle woanao gae ze op moogdj hole. Waal vurzichtig riejde det ze den neet de achterbank vol gubbelen.' Hilariteit alom oeteraard.

Last minute kwoom dur nog ein aanvulling mét nóg mier instructies; 'zoojd gae de kids get mét wille gaeve om te lunsje? Get aoj mik, get naate paeperkook, get kaoje koffie, get zoore mélk. Geweuen get waadet gae vanaaf wiltj en woea ze geine honger en dorst van lieje. Dan zurge wae veur get snuik en nateurlijk det voedzame Sonja Bakker aete als wae weer terug zeen.'

En zoea gesjiedde!

Dae bewusdje zaoterdigmörrege de wichter herstikke oetgelaote op ut kerkplein, snel de auto in en op nao Sevenum. Aangekome bie de kassa bleke de kaertjes neet mieër geldjig. Gauw nao un anger kassa, kaertjes om laote zétte en toen koste wae eindelijk noa binne. Dur waerdje eine kieër rónjdj gekeke, ein aafpraak euver de lunsjtieëd gemaaktj en de meiste vogels woore gevloge. Perfect oppertieed zoote alle dames en hieëre weer aan heur boterhemkes en snuik, en toen zooje ze 't.. Dao kwoome Toos en Morrel aan. Ffkes mét oppe foto, de neuedige high fives en gauw de lékste stukskes mik erin zoeëdet de jeugd weer wiejer kos, en de aoj dur achteraan! Ut waer waas ze goodgezindj (ut groeëtste deil van de daag), de sfeer waas oetstaekendj en ut waas neet druk, dus eederein kos dék in de spannendje attracties zónger lang wachttieëje. Sommige dames höbbe heur grenze verlagtj wat de achtbanen betref. Oet betrouwbare bron höbbe wae dan auch vernome det de pap van de adjudante ziene lol op kos toen hae ein paar daag later weer mét dochterlief nao ut zelfdje park ging. Hae keek ein bitje greun wie det d'r thoes kwoom.

En zoeë als altieëd kumtj aan alle leuke dinge weer ein inj. Noa det de hieële bups veilig terug in Haler waas kwoom de "frietemins" zoea als beloofdj nog langs mit toete vol friet en frikkedelle! De wichter höbbe al met al weer genote van eine fantastische daag. Vraoge wae os waal aaf.. zooje ze de achterbanke vol gegubbeldj höbbe?





b-mediagroep West  
Draadbaan 39  
2352 BM Leiderdorp

b-mediagroep Zuid  
Posthoornstraat 69  
6219 NV Maastricht

085 - 210 35 30  
info@bmediagroep.nl  
www.bmediagroep.nl

**Druk**

**Print**

**Sign**

Dees

# VASTELAOVES GEZÉT

waerdj uch aangebooje door

Vastelaoves Vereininging

# De Rabbedabben

Haler-Uffelse

2021

2022

## Donateur waere?

Wiltj gae es particeleer auch uch steinke biedraage aan de instandjhoajing van de Halerse Vastelaovendj, doneertj den

€ 11,-

op bankraekeningnummer NL 22 RABO 0138613532

Veur mieër info:

[www.rabbedabbe.nl](http://www.rabbedabbe.nl)

Redaksie:

Rik, Peter Paul

Lee-out:

Peter Paul

Foto's:

Peter Paul

Drukwérk: b-mediagroep



Vinj ós op

Feesbook

<http://www.facebook.com/pages/Vastelaoves-Vereininging-de-Rabbedabben/217234991746623>



© 2021-2022  
V.V. de  
Rabbedabben

| KvK : 12068803 | Rabobank: NL22 RABO 0138613532 |